

Tres partido a abstene di participa den debate pa comunidad Latino



ORANJESTAD- Ayera nochi a tuma luga Debate Democracia Aruba 2017 na Cas di Cultura sin presencia di representante di tres partido: AVP, CURPA y RAIZ. A pesar cu representantenan di RAIZ a presenta na Cas di Cultura, nan a abstene di participa den e debate. Te ainda no ta conoci e motibo pakico pasobra nan a wordo invita, segun e organisadonan.

E debate aki a wordo organisa pa e comunidad La-



tino. Sinembargo den e publico tabatin mas hendenan local cu hendenan di afo. E organisadonan a pidi pa e representantenan di cada partido por expresa nan mes na Spaño. Ricardo Croes di RED a haci su introduccion na Spaño, pero despues el a dirigi su mes na Papiamentu hunto cu Candelario Boshhi Wever di UPP.

Asunto relaciona cu debe publico, criminalidad, problema social, economia, infraestructura, lucha contra corrupcion y prioridad di e gobierno actual a wordo trata den e debate aki. Tambe e aspectonan di ley di LTU, integracion, cultura y tradicion. Tin biaha e comportacion di e publico tabata emocionante, y moderado Wilmer Aristizabal mester hala nan atencion bisando cu nan ta aplica e codigo di silencio. Kiermen

solamente batimento di man. Sinembargo, compara cu e ultimo debate organisa pa KvK no tabatin mucho problema cu e publico.

Candelario Booshi Wever a presenta su punto di bista pa ehecuta e Modelo Suiso atrobe. E modelo aki ta encera cu personanan cu ta bin Aruba pa traha por haya estadia pa maximo 3 aña. Sr. Wever a argumenta cu e modelo aki lo trece mas cupo di trabou pa yiu di tera.

Di parti di POR, Jairo Boekhoudt a expresa cu 'POR ta contra e modelo aki pasobra no ta humano pa exige cu personanan cu a cuminsa traha un bida akinan bay bek nan pais despues di 3 aña'. Den nos siguiente edicion nos lo trece un relato mas extenso di e debate.